

Polgo Hasia Pas Deli Timotibolo Asena Tolai

Hasia nedebo tau sabo po

Te bidi Pol te Godigo gesi wiegi yai po pususu biligi pobadi, aga te hanu nogi Listraba sabolama, te bulu Galesia Provins tɔ pedaide biliyu, tama te po tede pusali. Tama gesi bidi me deli nogi Timoti agai te po odolama tama homu hasegelama, tama Kraisgo po wali pabo gagalali. Aga te hanu Listra buludu asai bidi dao. Aga ida te Juda hani we da, te aga aya te Grik hani bidi dao. Polgo aga selama, tama augwali si biliyu, te Godigo sɛ haniani buluba egi pai. Te po te buku nogi Tagala Palai, te Daj 16:1-3, tede elalubo po suo. Nosali Polgo Timoti te Efesus hanude taga soali. Agai homugo te bidi Timotigo te tede bidali Kraisgo po wali pabo we bidi hani tonalubo sɛ eyu, aga augwaligo tobolu bidi bidaibao. Tama e pas tomode Polgo te bidi Timotibolo te haniani tau sabo po weyu, tama te we bidi hani dodolobo po wabo. Te tibo po ola mabo bage te Efesus bulude elalubaso, te bidi Polgo Timotibolo augwaligo po wabo tagala wao wali. Tama te bidi Timotigo te Kraisgo po wali pabo hani tomode elalubo bidi meba selama tama augwaligo te Godigo we bidi tau sabo sɛba muao, te Polgo te tobage po me asena tolali.

Timotigo aga digi aga ebo kolesaga bugagia tonalu, tama Godigo po wali pabo we bidi tigidali me tonalu yai

(Daj 1-6)

1 ¹Ena Pol dao, ena Krai Jisasgo po sela pabo sɛ bidi dao. God da, te da ma dobola sabo bidi dao, tama dago suainogo dwagi yai homu eyu tonalubo bidi deli te Krai Jisas dao, tama augwali sigo enabolo te sɛ yao po obaso, eno te Kraisgo po sela pabo sɛ bidi bidibao.

²Timoti, nage dali eno e po asena tolobao. Te eno nagebolo Godigo po pusama, tama nago homu te poba begi peyu, tama nage te gesi noma bidi pedalali. Tama tiyu, tama nage eno ogwa mu tiwai dao. Tama eno homugo dago Aya God dali, dago Genuai Bidi Krai Jisas dali, augwali sigo nagebolo te olo tau sabo kolesagago dwagi yai sɛ eyu, tama homu dene eyu elama, tama nago homu nagamea peyu bugagia bidao.

Tibo po ola mabo bage sagia sao wao po

³Polobadu ena te moni t̄ Masedonia teba painogo eno nagebolo po wali, te tiwai naga megi eno nagebolo po ma obao. Nage te Efesus hanude me bidao, tama bidi meba augwalibolo te po weyu, augwaligo te we bidi dabe augwali tibo po ola mabo tagalao, te bomonama te po augwalibolo wao. ⁴Tama wao, “Dagego te haniani olo namu po dali, te polobadu w̄ dabego nogi hauwade po mibo dali, te tobage po mibo tagalao,” te po bomonama augwalibolo wao. Magi baso meni. We bidi augwaligo te po odolama, tama tede po miyu, tama augwa hasi wado po wabo dao. Tama tebogo te we bidi augwaligo Godigo s̄ yabo homu konebo tau sabo menio. Te dago te Godide konealubo po d̄ wabo, tebogo naga dabolo Godigo s̄ yabo homu ola mabo dao. ⁵Tama eno augwaligo te tobage po ola mabo tagalao wali po page e dao: augwaligo eno po wali pobaso da, teda augwaligo homu te meda meniama, tama te dwai s̄ me dwagi yai s̄ me dagalabo homu bugagia elaluama, tama augwaligo homu mu eyu, tama Kraisde konealubo po d̄ mu waibao. Tama tiyu, tama te tigidali kolesagago augwaligo te gasa we bidi dali dwagi yai homu eyu godolo mu yabo homu kolesaga hodolaibao. ⁶Bidi meba augwaligo te dwagi yai kolesaga tagalama, tama augwaligo te pabo t̄ me tagalama, tama augwali subigila te olo kedu meni yai po ola bilibo dao. ⁷Augwali te Godigo bomai pode te po ola mabo tisa bidi bidabo godolo homu ebo dao. Tiali goli augwa digi augwa wabo po page me konebe, tama augwaligo bomonama tama “Awe, dago gisiga koneani, te dago ola mabo po te mu po naga dao” wali goli, augwaligo te ola mabo po page me konebeo.

⁸Dago hania koneani, te Godigo bomai po da, te dwagi yai dao, te bomai pogo ebo s̄ elalubao. Dago te bomai pogo ebo s̄ naga eyu da, te usu mu dao. ⁹Tiali goli te me dago konea. Godigo te bomai po mani. Te bomai po da, te doloba pai we bidi dabe augwali tonaluabo po meni. Te menio. Te bomai po te haniani dwai kolesaga ebo bagebolo wai dao. Augwaligo te bomai po ola tagalama tama te po sela s̄ bage dao. Augwaligo God tudiba muyu, dwai kolesaga ebo bidi dabe dao. Te Godigo kolesaga tagala po weyu, tama te t̄de kolesaga wali pabo we bidi dao. Meba augwaligo augwa aya ida ela mubo bage dao, meba te gasa bidi ela muyu ebo bidi dabe dao. ¹⁰Te penani kolesaga ebo we bidi, te ogomani dali dwai dwai s̄ ebo bidi dabe, te we bidi wi sabo bidi dabe me, te tibo po wabo bage, te po t̄de tibo po wabo bidi dabe me, te bomai po dabe te tobage we bidibolo muai dao. Te tobage kolesaga te Sodom de Gomora hanu side yali kolesaga tiwai dao. Me te gasa haniani dwai s̄ ebo bidi dabe me, te Godigo dwagi yai ola mabo po odis̄ bage, augwalibolo me te bomai pogo po elalubao. ¹¹Te dwagi yai ola mabo po da, te ula yai bomo elalubo wiegi yai bidi God agai te po pusao olama enabolo mani gesi wiegi yai po tomode elalubao.

Godigo Pol aga homu dene eyu tau sali po

¹²Dago Genuai Bidi Krais Jisas agai eno şe yabo bomu mobaso, tama eno agabolo buba hwi wabo dao. Agai homu ena agaba homu keş pai bidi bidiyu, tama agai şe yabo ena usu yaibao. Agai te homu elama, tama aga şeba ena mubaso, eno agabolo nage usu da po wabo dao. ¹³Mu tama, polobadu eno agai nogibolo dwai posobo po wabo bidi bidai, tama eno agai po odobo we bidi dabe dali boi bidi eyu, augwalibolo dene mabo şe iduai. Tama eno aga dali hagoma eyu, aga nogi dolobo şe eyu bidai. Eno Kraisde tama dwai şe yali goli, Godigo ena homu dene eyu tau sali. Magi basowe? Eno konealubo po Kraisde daş wasişbaso eno bugagia konesişama, tama eno te tiwai dwai kolesaga aga dali iduai.^a ¹⁴Tama dago Genuai Bidigo olo tau sabo wiegi yai kolesaga umabo mu enabolo eyu, tama agai enabolo te agaba homu begi pabo bomu me, te we bidi dali dwagi yai homu eyu godolo ebo kolesaga me, te kolesaga si agai enabolo olo mani. Da Krais Jisas dali wadolobaso, tama te kolesaga si agai dabolo mani. ¹⁵E konealubo po te mu po dao, tama tigidali we bidi e po odama augwaligo homugo mu daş omainao: Krais Jisas te tşba dulali, te tşde dwai şe ebo we bidi dabe ma dobola sainogo asali. Awe, te mu po dao, tama te hasia polasa dwai şe yali bidi te ena digi tama e dao, eno yali dwai şe te gasa bagego dwai şe aiyaba elaluali. ¹⁶Ena te hasia polasa dwai şe yali bidi te ena digi bidali goli, Jisas Krais agai ena dali homu dene eyu tau selama, tama ena ma dobola sai. Magi basowe? Te ena subo piksa noma tiwai yali. Tama nosali te gasa dwai şe ebo we bidi augwaligo te Kraisgo te dwai şe ebo bidi polo elişabo wiegi yai kolesaga hania konemainogo eyu, agai ena dali te kolesaga naga hasia yai dao. Tama augwaligo homu aga poba begi peyu, tama bidibo ula selama, bugagia sesemane sogo bidada peyu, bidada pomainogo yaibao. ¹⁷Tama tibaso, eno agai ena dali yali şede homugo kone paluyu, tama aga genuai nogi me aga wiegi yai ula yai bomu me te si ugwaba muyu, tama eno e po obao: "Aga te Tuni Bidi tigidali sogo bidibao. Aga me isibo meni, gamonaibao. Tama bidigo aga me subo menio. Agaduba deli naga te God mu dao. Genuai nogi me bomu me te agade sesemane sogo mu bidada peyu, bidada pomainao. Mu dao," eno te po obao.

¹⁸Eno ogwa Timoti, polobadu Godigo po pusubo profet bidi dabe meba augwaligo nago nosali yabo şede mu yabo po augwaligo dabolo pusai dao. Tama megi me eno te po wali peyu, tama eno e po nagebolo obao. Tama nage me, nago te po ma koneama, tama te pogo nage tau siyu, te nago hwıabo nai tiwai elalumainao. Tama tiyu, tama nago bomu elama, tama nago ebo şe bugagia yao, te hwıbo tiwai yao. ¹⁹Tama bidiyu, tama

^a 1:13 Tpi 8:3; 9:4-5

nago te konealubo po nago homugo bugagia daų wao, te dwai se me isiama, tama nago te dwai se me dwagi yai se me dagalabo homu bugagia elaluyu bidao. Te bidi meba augwaligo te augwa dwai se me dwagi yai se me dagalabo homugo augwalibolo wali po ola tagaluyu ebaso, tama augwaligo Godide konealubo po daų wabo tagalai dao, tama augwali hobedagia dwai kolesaga daide bidibao. Te augwali te tamu ađ daidu pabo moni geba sip tiwai dao, tama tede elalubo moni masigigo te moni geba sip dolobo tiwai gilama yai dao. Augwaligo Godide konealubo po daų wabo tagalai dao. ²⁰Te Himeneus de Aleksander, te bidi sigo te tiwai kolesaga yalio. Tama tibaso, augwali si eno te dwai haubo tobolu bidi Satango nogoba muani, agai augwalibolo seųe mawaibao. Augwali sigo seųe selama, tama Godigo nogide dwai posobo po wabo tagalamainogo eno tama yai dao.

**Dago Godiba hanalu gedu haluasa po wabo kolesaga
eyu, te tigidali we bidi tau sao wali po**

2 ¹⁻²Tama tibaso, nago yabo seųe, te se nago emainogo eno nage homu hodolobo po obao. Hasia tuni po e tama. God agai tigidali we bidi tau somainogo eyu, nago te Godigo hani we bidi tigidalibolo gedu haluasa po wao, te po wao. Tama tiyu, agai augwali tau sao po hanaluyu, tama agabolo nage usu dao po me wao. Godigo te gavman tuni bidi dabe dali, te genuai gavman seųe ebo bidi dabe tigidali tau somainogo eyu, dagego agabolo gedu haluasa po wao. Magi basowe? Godigo augwali tau siyu, tama augwaligo augwa te we bidi tonalubo seųe bugagia eyu da, teda da we bidi tigidali da bugagia bidaibao. Gasa bidi augwaligo dabolo seųe magobeo, tama da tigidali homu nagame wiegi yai elama Godigo homu naga wali peyu, tama gasa we bidi dali bugagia bidaibao. ³Te tobage gedu haluasa po wabo kolesaga dwagi yai dao, tama tede te da ma dobola sabo bidi God aga dwagi yai homu ebo dao. ⁴Te agai homugo te agai tigidali we bidi ma siyu, tama augwaligo aga mu po page mu konemainogo ebo dao. ⁵Magi baso meni. Te God deli naga bidibao. Tama te God de bidi si tomode naga dolalubo bidi deli naga te elalubao, te bidi te Krai Jisas dao. Agai God dali we bidi dali deliba sisinabo bidi dao. ⁶Agai aga bidibo ulago digi te tagaliyu, te tigidali we bidi ma abelali. Te tama tiali kolesagade Godigo aga bodolu mani sogo da ola mani, te agai tigidali we bidi ma sabo homu ebo dao. ⁷Tama tede Godigo ena te agai po sela pabo seųe bidi mubaso, tama eno agai po pusubo seųe elalubao. Eno mu po naga obao, eno tibo po me wabeo, te Israel hani isiųwai bidi dabebolo po ola mabo tisa bidi agai ena nigilali, te eno augwalibolo te Godigo mu po dali te Krai de konealubo po augwa homugo daų wabo kolesaga me eno ola momainogo yali.

⁸Tama eno homugo te tigidali bulu bidi dabe augwaligo gedu haluasa po omainogo homu ebao. Eno homugo augwali Godigo kolesaga naga

wali pabo bidi dabe bidu, tama haliga şeḃe me wado po wabo tagaliyu, tama augwa nogo ugwaba siyu, te augwaligo gedu haluasa po omainogo ebo dao. Nago augwalibolo tama tiao po wao.

We dabe sibigo yabo kolesaga po

⁹Eno homugo te we dabe sibigo me augwa gudubo ugwade homugo bugagia kone paliyu, augwa nogi ugwaba sabo kolesaga te ugwade elamuo, te bidigo homu hodolobo şe me elamuo. Augwaligo te tobolu nisi me te tigi me te haniani bis dabego badi, te wiegi yai kapa golgo me te moni masigigo sabo ugwago me, te augwa tigi dali tobolu nisi me au ilama elamuo.^b ¹⁰Menio. Te we dabe sibi augwaligo te Godigo homu wali pabo homu eyu da, te augwaligo we bidi tau sabo haniani wiegi yai şe yao. Te da te augwa au ilibo nai tiwai mu dao. ¹¹Te we dabe sibi augwa digi aiyaba elaluama, tama pedauwali pania selama, tama po ola mabo bidigo wabo po sao. ¹²Te Godigo po odobo we bidi hani tomode te eno te we me deli te po ola mabo tisa bidi ma te bidi dabego tobolu we bidimainogo me gogolobo menio. Te menio. Te we dabe sibi augwali te pedauwali pania selama, tama bidigo wabo po naga odao. ¹³Magi baso meni. Te tiwai yai: Godigo Adam bolo hasia nigali, tama nosali agai te we Iv nigai dao.^c ¹⁴Tama me te Adamgo tibo po homude daş me wabe. Wego te tibo po homu daş olama, tama agai Godigo bomai po bolali.^d ¹⁵Tiali goli te we dabe sibigo te wai dabe ame nabo şe yaibao. Augwaligo te wai ame nabo kolesagade Godigo augwali ma dobola saibao. Tama augwaligo Godiba konealubo po sesemane sogo daş weyu, tama we bidi dali dwagi yai homu ebo kolesaga wali peyu, tama augwali dwai şe işabo kolesaga me wali pabo şe işama bugagia bidiyu, tama wiegi yai homu elalubaso da, teda Godigo augwali ma dobola saibao.

Te Godigo po odobo we bidi tonalubo bidigo wiegi yai kolesaga yao po wali

3 ¹E po te mu po dao: bidi me deligo te Godigo po odobo we bidi tonaluabo homu ebaso da, te bidi aga wiegi yai şe godolo ebao. ²Tama nago te Godigo we bidi tonalubo bidi nigiyu tama aga e tama bidao. Aga dolo mu bidao, tama te bidi dabe augwaligo agade te dwai şe ebo me gegogobeo. Aga te we deligo bidi naga bidao. Aga homu bugagia dodolama tama dulalua. Agai aga digi kolesaga bugagia tonalua. Aga subigila bidibo bidi bidamuo. Te aga te Godigo po odobo gasa buludu asali we bidi agai aga beba sabo bidi bidao. Tama aga te Godigo po ola mabo şede aga usu yao. ³Aga te bomai aşi tulama te esela pabo bidi tiwai bidamuo. Agai şeḃe polo eyu, bidi eleyu me egobeo. Menio. Agai te bidi

^b 2:9 1 Pi 3:3 ^c 2:13 Gag 2:7, 21-22 ^d 2:14 Gag 3:1-6

dabe dali imilai homu nagame yao. Agai te wabi subigila hwiġio. Agai homu te monede kuna daġ me olamuo. ⁴Aga bugagia keņasa bidiyu, agai te aga digi we wai puluba bugagia tonaluyu, tama te wai dabe aga dologode bidiyu, te augwaligo agai po wali pomainogo yao. ⁵Magi baso meni. Te bidigo aga digi aga we wai puluba bugagia tonalusiabo bidi da, aga te Godigo po odobo we bidigo tobolu bidi bidibo te usu me egobeo. ⁶Te tamadi gesi noma baptais tamadi sali bidi te tonalubo bidi se munu me menamuo. Tiyu aga te hagoma ebaso tama Godigo aga dali po tu elama dene mayu, te agai Satan po tu yaligia tiwai elama sela sawani. ⁷Te bidigo wiegi yai nogi te Godigo po odisawani bidi dabe augwali tomode elalubo bidi, te aga naga te tonalubo bidi se ebo usu yaibao. Te aga nogi wiegi yai me elalusiawani da, teda aga dwai se eyu, tama aga hale elama, tama te Satango hagani togobo wago te aga saibao.^e

Te Godigo po odobo we bidide se ebo bidi po

⁸Te nago te Godigo po odobo we bidi tonalubo se tau sabo bidi dabe nigiyu, augwali me e tama bidao. Te homu mu naga eyu, te wiegi yai kolesaga ebo bidi bidao. Augwali te bomai aġ tulama esela pabo bidi tiwai me elamuo. Augwali te gasa bidi dabego mone dabe anoma elama sabo homu ebo bidi bidamuo. ⁹Te augwaligo dwai se isiama tama augwali homu wiegi yai elaluyu, tama augwaligo te polobadu geme dualali po, te Godigo Kraisde dabolo waselali konealuabo po homugo daġ olama bidao. ¹⁰Te hasia dagego augwaligo ebo kolesaga usu sao. Tama augwaligo kolesaga dolasa elama tama po meni baso da, teda augwali te tau sabo seba muao.

¹¹Tama te bidi dabe augwaligo we dabe, te we dabe te wiegi yai kolesaga ebo we bidao. Augwali te posobo po wabo we dabe bidamuo. Te augwaligo augwa homu bugagia dodolama tama bidao. Sesemane sogo te augwaligo wiegi yai dolo kolesaga naga yao.

¹²Te tau sabo bidigo we te deli digi naga selama bidao. Agai te aga we wai bugagia tonaluo. ¹³Te bidi dabe augwali te Godigo po odobo we bidi tau sabo se bidi bidiyu tama wiegi yai se eyu da, teda we bidi gedude augwali nogi wiegi yai elaluaibao. Tama augwaligo te Krai Jisasde konealubo po bomu elama pusubo usu yaibao.

Godigo po page megi waselali kolesaga po page te genuai nai mu da po wali

¹⁴Eno homugo ena nage bidibo madi tamadi asaibao. Tiali goli megi eno e pas nagebolo asena tolobao. ¹⁵Magi baso meni, ena polo sabalisiabaso da, teda nago e pas selama tama nedama, tama nago nage Godigo hanide bugagia

^e 3:7 Tai 1:6-9

bidabo kolesaga po tede koneagameo. Te God aga da te bidibo ula elalubo God dao. Te agai po odobo we bidi hani augwali da te Godigo be tiwai we bidi dao. Tama augwali te Godigo mu po tolalubo te bomai ni pos dali kau ni me tiwai elalubo dao. ¹⁶Awe, mu tama, te polobadu geme dualali po, te Godigo dabolo waselali konealuabo po page te genuai mu elalubo, tama bidigo te pode te po mu menio wabo te usu me egobeo. Te konealuabo po e dao:

Aga te tigi elalubo bidi mu pedalali, tama hania hanilai.

Tedali Mobo Bidigo we bidibolo ola mani, te bidi aga dolo mu yali.

Te dagalude mobo bidi ensel dabego aga suai.

Tama po pusubo bidi augwaligo agade po te tigidali we bidi hanibolo pusigi pali.

Te tõe bidi dabe augwaligo konealuabo po agade daş wai.

Te Godigo aga dagaluba odasa holama, tama megı aga bomo dali, genuai nogi dali selama bidibo dao.

Tibo po ola mabo bidi dabe augwaligo po waibao

4 ¹Godigo Tedali Mobo Bidigo hanilama te po wai: nosali sogo bidi meba augwaligo te Kraisde konealuabo po tagalaibao wali. Te augwaligo te tibo po wabo dwai haubo noma bidi dabego ola mabo po odama, tama augwaligo te dwai haubo noma bidigo po wali paibao. ²Bidi meba augwaligo dwai şe dali dwagi yai şe dagalabo homu te isali tiwai dao. Tama tibaso augwaligo augwa ebo şe dagalısıayı tama augwali tibo po wabo bage dao. Tama “Eno mu po naga obao,” wai goli, augwaligo te dwai haubo noma bidi dabego tibo po naga ola mabo dao. ³Tama tiyu, augwaligo e tiwai po ola mabo dao, “Dagego te we sabo şe elamuo, te şe habu selai şe dao,” te po augwaligo ola mabo dao. Tama me augwaligo haniani tubo nai me badu habu selebo dao. Tiali goli Godigo te nai dabe nigali te da bidigo konealuabo po daş weyu tama agai mu po koneani we bidi, dago te nai dabe selama tuyu, tama Godibolo gedu haluasa po weyu ‘Nage usu da’ omainogo yai. ⁴Magi baso meni. Dago koneani, te Godigo nigali nai tigidali, te wiegi yai naga yai. Tiyu dago sayabuo. Dago Godibolo usu da weyu gedu haluasa po olama sao. ⁵Te Godigo te naide polobadu wali po dali, te dago gedu haluasa po wabo po dali, te po sigo te nai wiegi yai ilama pedalubo dao. Tama tibaso, te nai dago tuagameo, po meni.

Timoti te Kraisgo wiegi yai şe bidi bidimainao

⁶Nago te eno megı aşani po te dago ama dedebolo mobaso da, teda nage te Jisasgo wiegi yai şe bidi bidaibao. Tama tiyu, te konealuabo pode

me, te nago wali pabo tigidali wiegi yai kolesaga ola mabo po me, te po side nago genuai bomo bugagia sidu bideibao. ⁷Tiali goli te haniani olo namu po dali, te haniani kedu meni yai po dali, te tobage po mibo te nago odogio, te tudiba muao. Te tobage olo po dago God bugagia koneabo tau sabo po menio. Bomo elama, nago naga digi te Godigo kolesaga wali pabo şe ola mayu bidao. ⁸Nago koneani, te dago tigigo şe ebogo te tigibolo bomu mobaso, te bogo da tau sabo dwasianu usu ebo dao. Tiali goli Godigo kolesaga wali pabogo te da tau sabo te hauwa mu ebo dao. Te şe ebogo da megı te bugagia bidibo ula mabo dao, te nosali bidabo ula tau sabo me te usu yaibao. ⁹Te po mu tama wali, tama te po tigidali bidigo odama, tama augwaligo homu te poba begi pobaso, te usu yaibao. ¹⁰Tama da Godigo kolesaga wali pabo, te bogo da megı me, nosali me tau sabo usu baso, dago bomu eyu şe dene mu ebo dao. God da, te tigidali we bidi ma sabo bidi da, tama agai te Kraıde konealubo po augwa homugo daş wali we bidi da mu ma dobola sabo bidi dao. Tama tibaso, dago te bidibo ula elalubo Godıba homu begi pelama, tama agai da somainogo dago aga tonalubo dao.

¹¹Nago bomonama te po te Godigo we bidi augwalıbolu pusao, tama augwaligo wali pomainogo ola mao. ¹²Augwaligo sualı, nage gesi bidi homu ebo, tiali goli augwaligo homugo nage te olo bidi yalı homu ebo gogologio. Menio. Nage te polalubo bidi bidao. Tama tiyu, tama nago po wabo kolesaga me, te bilıbo me, tama nago we bidi dali dwagi yalı homu eyu godolo ebo kolesaga me, te nago Godıba homu begi pabo kolesaga badı, tama te magı dwai şe isişwai wiegi yalı kolesaga nago ebo augwaligo suyu, tama augwaligo homu Godıba begi pabo we bidi augwaligo nage wali asaıbaı. ¹³Ena nago bidıbo digi nosalı asaıbaı. Te sogo nago ena tonaludu digi, nago te Godigo bukude aşanı po aga hani we bidıbolu nedebo şe yao. Tama augwalıbolu Godigo po pusuyu tama ola mayu bıdalıuo. ¹⁴Polobadı te Godigo po pusubo bıdı augwaligo nago nosalı yabo şede mu yabo po weyu, tama te monu dabe tobolu bıdı augwaligo augwa nogo nago toboluba muanı. Tama te sogo Godigo nago şe yabo bomu dali, homu kolesaga dali nagebolu olo manio. Te manı nai tagalıgio. Te manı bomogo me, te homu kolesagago me nago naga şe yao. ¹⁵Tıgidalı bıdıgio nago ebo te pua pai holobo ni tiwai şe sumainogo eyu, tama sesemane sogo nago te Godigo we bıdı tonalubo şe bomu elama bugagia yao. ¹⁶Tama naga digi ebo kolesaga me, te we bıdı ola mabo şe te bugagia tonalıuo. Tama tidıuo. Nago tama tiyu da, teda naga şego digi nage dali nago po odobo we bıdı dali ma dobola saıbaı.

We bıdı dodolobo wiegi yalı kolesaga po

5 ¹Te Godigo po odobo we bıdı hani tomode te monu dabe tobolu bıdı me deligo dwai şe eyu da, nago aga te dwai şede ma dodoloyu

tama nago agabolo sesena pai po me olamuo. Menio. Nago po nagame elama dua digi dodolao, te naga aya monu dodolobo tiwai gilama yao. Tama nago te gesi ogwa bidi dabe dodoloyu, te naga ama dodolobo tiwai gilama yao. ²Tama nago te mosi dabe dodoloyu, te naga ida mosi dabe dodolubo tiwai gilama yao. Tama nago te gesi we dabe dodoloyu, te naga abe dodolubo tiwai eyu, te wiegi yai dolo homu naga ebadi augwali dodolao. Mena bidi nago dwai şede dodolabo homu ebo bidi, nago sesena pai homu eyu dodologio.

³Te we me deli aga bidi isai digi, tama we agaduba mu bidibaso da, teda nago te Godigo po odobo we bidi augwaligo te we tama bidibo koneama tama augwaligo augwa mone gego te we tau sao po wao. ⁴Tiali goli te bidi isai we me deligo te aga wai genuai yai me, ma aga waigo wai te genuai yai elalubaso da, teda augwaligo bugagia koneao: te augwaligo polasa yabo şe te augwaligo Godigo po wali peyu, tama augwa hani we bidi bugagia tonaluyu, tama augwali polobadu dwasianude aya idago bugagia tonaluali tobage kolesaga wei ponoyu tonalua. Awe, Godigo te kolesaga godolo mu ebo dao. ⁵Tama we aga bidi isai madi, tama we agaduba mu bidiyu aga tau sabo bidi meni baso da, teda te wego te tiwai kolesaga ebo dao: agai Godiba tialuyu, tama Godigo aga tau somainogo eyu giligade me hulide me te agai Godiba gedu haluasa po weyu ena tau sao wabo dao. ⁶Tiali goli gasa we me, te aga bidi isai madi, tama te wego te tigo ebo kolesaga naga wali pabo homu eyu, tama dwai kolesaga ebaso da, teda aga tigi bididubadi goli aga bidibo noma te Godigo gedude isai dao. ⁷Nago bomonama te eno tamadi wali po te Godigo po odobo we bidi augwalibolo pusao. Awe, augwaligo tama temainao, magi baso meni, augwali te gasa we bidigo gedude augwaligo dwai kolesaga elalugobeo. Tiyu gasa bagego po augwali dali elalugobeo. ⁸Eno te po magi baso obawe? Te bidigo aga deli hani dabe me, ma aga kaneme deli hani digi te bugagia tonalusişwani da, teda te bidigo aga Godide konealubo po te tudiba munama tama agai ebo kolesaga te dwai mu elama, tama tebogo te Godigo po odisaşwai bidi dabego ebo dwai kolesaga te aiyaba elaluaibao. Te Godigo po odisaşwai bidigo augwa digi te tiwai dwai kolesaga me ebeo. Menio! Augwaligo te augwa bidi isai we dabe, te augwaligo bugagia tonaluyu tau sabo dao.

⁹Te augwali tau sabo hani bage meni yai wilawe we elalubaso da, te Godigo po odobo we bidi hani augwaligo augwa mone gego te tobage wilawe we tau somainogo eyu, augwaligo nogi te bukude dago aşeşo dao. Te bukude nogi elalubo wilawe we dabe naga augwaligo te tau sabo mone sabo dao. Tama nago te bidi isai we dabe nogi te bukude olo aşeşio. Menio. Te bidi isai we aga kibu be bidi sese sela wali, te tobage bidi isali we aga bidi deli naga dali bidali mosi we elalubaso da, teda aga nogi naga nago aşeşo. ¹⁰Tama e tobage haniani wiegi yai şe yai nogi elalubo

we tiwai: agai te aga wai puluba bugagia tonaluali. Tama agai te gasa bulu we bidi augwali te agai beba asobode nai mayu yali. Tama imilai homu eyu, agai te Godigo po odobo we bidi tau siyu saḡa we tedabo se yai dao. Tama agai te seḡe dali dene dali sali we bidi dabe tau siyu yai. Tama te wilawe we aga te tobage haniani we bidi tau sabo dwagi yai se ebo kolesaga wali pabo we bidali da, teda nago te tobage we dabe augwali naga nogi te bukude aḡaḡo.

¹¹⁻¹²Tiali goli nago te augwa bidi dabe isai, te gesi we dabe augwali nogi aḡenamuo. Menio! Te augwaligo homu hodolama tama te bidi dali ma pabo homu ebo si, te augwaligo Kraisi te tudiba muaibao. Tama tiyu, tama augwaligo agai seḡe te hasia daḡ wali po augwaligo togolama, tama tede seḡe saibao. ¹³Tama gasa dwai kolesaga me augwaligo koneaibao. Augwaligo se isayu tama augwali tigidali we bidigo beba olo pabo kolesaga saibao. Te kolesaga naga egobeo, te gasa dwai kolesaga me yaibao. Augwaligo te gasa we bidi dabe augwaligo po anoma elama tama po sabilibo se eyu, tama augwalibolo posobo po weyu yaibao. Te po augwaligo tedela paibao, haniani beba. Tama tiyu, tama augwaligo me te hogwa sa wali po togolama, tama augwaligo gasa we bidibolo subigila pusaibao. ¹⁴Tama tibaso, augwaligo tama idali weyu, eno homugo Timoti nago te bidi isai gesi we dabe te augwali bidigo ma sao po wao, tama wai ame nobaso, te augwa hani tonalubo se yao. Te augwaligo tama tiyu da, teda, te da dali te dwai po wabo boi bidigo tu gegabo usu meni yaibao. ¹⁵Eno tama tiwai po te gesi we dabede wali, magi baso meni, te we dabe mebago te Kraiso seḡe daḡ wali po te tagalama, tama augwaligo te Satan wali pabo gagalai dao. ¹⁶Te Kraise konealubo po daḡ wali we me deli te aga hani tomode te aga bidi dabe isai we dabe meba elalubaso da, teda te we aga digi te bidi isai we dabe tonaluyu tau sao. Te tau sabo se te Godigo po odobo we bidi hanibolo te wego munamuo. Meni. Augwaligo te agaduba deli mu bidibo wilawe we dabe, te augwali tau sabo bage meni yai we dabe, augwaligo te tobage we dabe tau siyu tonalumainao.

Tobolu bidi dabede wali po

¹⁷Te Godigo po odobo we bidi hani tonalubo monu dabe, augwaligo te se bugagia eyu da, teda te hanigo augwaligo nogi ugwaba siyu, tama augwalibolo te augwaligo sabo pe mone mayu, tama meba ugwadu manuma mao. Te tonalubo bidi dabe tomode te bidi dabe meba augwaligo te se eyu, tama augwaligo me te Godigo po pusuyu tama te we bidi dabebolo ola mabo se bugagia eyu te se dene yali, te tobolu bidi dabe augwalibolo te manani masigi polasa mao. ¹⁸Magi baso meni. Te Godigo po bukude te Mosesgo polobadu e po aḡani, “Te nai wit ge bo sela somainu te nago bulmakau agai se eyu tama te ge dabe saḡaḡo agabadi, nago aga gani te bonogo daḡ wagio, aga te ge meba tumainao,” te po

aşani. Te tobage po me elalubao, “Te şe bidigo aga mone sabo usu dao,” te po wai dao.^f ¹⁹Tama bidi me deligo naga te po waibao, “Te Godigo po odobo we bidi tonalubo bidigo dwai şe yali” po obaso da, teda nago te po odogio. Tiali goli bidi sigo ma selago te po obaso da, teda nago odao, te bidi osola suo.^g ²⁰Tama tiyu, tobolu bidi dabe mebago te dwai şe yaibaso da, teda nago te Godigo po odobo we bidi augwali tigidali gedude te dwai şe yali bidibolo “Nago te dwai şe yalio, te kolesaga tagalama, tama Godigo po wali pabo ma gagalao,” te po wao. Augwaligo gedude tama eyu da, tama gasa tobolu bidi dabe augwali me te tiwai dwai şe ebo wi elama tagalumainao.

²¹Te God me, Krajs Jisas me, te Godigo diş sali ensel mobo bidi dabe, te augwaligo gesabidide eno nagebolo dolo mu obao, te eno megi tama nagebolo aşani ola mabo po nago bugagia wali pao. Tama tiyu, tama nago te tobolu bidi dabego yali şe osola subadi, nago te bidi me delide wei ebo abagi homu eyu, tama gasa bidi me delide dwai homu eyu munu te tiwai elamu dao. Te bidi dabe osola subo şe te nago dolo mu naga yao. ²²Tama me nago te bidi me deli polo selama, tama aga bugagia osola susişbadi, tama nago nogo aga toboluba muyu, tama aga te Godigo we bidi tonaluabo tobolu bidi nigilamuo. Magi baso meni. Te nago aga polo te tobolu bidi nigilama tama agai dwai şe eyu da, teda nago aga te dwai şe ebo tau sali tiwai waibao. Tama idali weyu, dua dao. Nago te naga digi bugagia tonaluyu, tama dwai şe me deli isişwai bidi bidao.

²³Timoti, nago te olo weş naga tubo kolesaga tagalao. Tama te hauwa sogo te tigi bomo silabo gasi nageba pedaliyu ebo, tama te gasi sela şawainogo da, teda nago te naga tabi tau sainogo te nago dwasianu wain weş dali tuao.

²⁴Te Godigo po odobo we bidi hani tobolu bidi nigilibo şede eno e po me nagebolo obao. Nago te bidi dabe hasia osola subadi, e po ma koneao. Te bidi mebago dwai şe dabe hanilama hania mu elaluyu, tama augwali te po tuş yabo madi poligi pobaso, tama dago augwali polo dagalama koneani. Tiali goli bidi mebago dwai şe geme dualaluama, tama nosali naga hania hanilama pedalubo dago subo dao. ²⁵Te wiegi yai kolesaga me te tiwai naga dao. Te wiegi yai kolesaga dabe me te hania elalubo dago subo dao. Tama meba dwagi yai kolesaga te we bidi dabego ebo te hania polo me pedalisiaşyu yali goli, te me sesemane sogo geme me dualalugobeo. Menio! Nosali dago te me koneaibao.

Olo şe ebo bidi dabede po wali

6 ¹Te nago bidibo digi Efesusde bidibo Godigo po odobo we bidi augwali meba te masigi sisşbo olo şe ebo we bidi dabe dao.

Augwaligo augwa genuai bidigo şe eyu augwaligo tama tiwai homu yao, “Te ena genuai bidi aga te wiegi yai bidi, tama eno aga nogi ugwaba sabo te usu dao. Agai te şe yao wabo po eno odaibao,” augwaligo te homu yao po wao. Tama te şe we bidi dabego te tiwai homu kolesaga eyu da, teda te genuai tonalubo bidi dabego te Godigo nogide me te Godigo po me te si dali dwai posobo po wabo kolesaga me egobeo. ²Me ma, te olo şe ebo bagego genuai bidi aga te Godigo po odobo bidi bidiyu da, teda te şe ebo bidi dabego te homu me ilamuo, “Te genuai bidi aga Kraisba homu begi pai bidi bidibaso, aga da te eno ama tiwai dao. Tama tibaso, ena dali eno şe tonalubo genuai bidi dali, te da si Godigo gedude tiwai si dao. Tama tibaso, eno agai po odogobeo, te tigi dene şe egobeo.” Te homu augwaligo ilamuo. Menio. Augwaligo tama homu yao: “Eno bomo elama eno genuai bidigo şe bugagia mu eyu, tama eno te tiwai aga tau saibao. Magi baso meni. Eno genuai bidi aga te Kraisba homu begi pai bidi, tama eno aga dali dwagi yai homu eyu godolo ebao.” Te şe ebo bage augwaligo te homu yao wao.

**Te mone me doado bage hauwa sabo godolo ebo homu
kolesagade te tigidali dwai kolesaga page elalubao**

Te sesemane sogo nago te we bidi augwalibolo te tiwai kolesaga eno nagebolo wali po tiwai gilama te we bidi ola madubadi geao, tama augwaligo homu hodolama wali pomainao. ³Tiali goli bidi mebago te po wali pişama tama augwaligo bidi dabe gasa po ola mabo dao. Te gasa po te dago Genuai Bidi Jisas Kraisgo doloba pai po dali tiwai si isişwai po dao. Tama te gasa po te dago te Godigo kolesaga wali pabo ola mabo po dali tiwai si isişwai po dao. ⁴Te gasa po ola mabo bidi agai te hagoma genuai eyu, te agai Godigo kolesaga dwasianunu me konebeo. Menio. Agai homu kolesaga gasi tiwai ebaso, tama agai te bidi dabe dali konila po wabo kolesaga godolo ebo dao. Tama subigila te dwasianu po pagede te po si wado po wabo ebo tiwai kolesaga me agai godolo ebo dao. Te tobage konila po wabode te tiwai kolesaga pedaludu gebo dao: augwaligo dwai homu gasa bidi dabe dali eyu, tama augwaligo augwa hasi konila po weyu, tama posobo po wabo, tama augwaligo te homu ebo dao, ‘Te gasa bidigo dwai şe yabo homu ebao.’ ⁵Tama sesemane sogo augwaligo wado po subigila weyu ebo dao. Te tobage bidi dabe augwali te gagea pai homu ebo bidi pedalama, tama augwaligo te mu po te augwa homude daş wabo tagalai dao. Augwaligo homugo te Godigo kolesaga wali pabo te bisnis ebo sunumi augwaliba bugagia pedalama, tama mone hauwa siyu, tama walu hauwa sabo mone bidi pedalaibao homu ebo dao.

⁶Mu tama, te bidigo Godigo kolesaga wali peyu, tama aga homude te tigidali nai te aga usu yali da homu ebaso da, teda aga te wiegi yai doado bage hauwa elalubo bidi tiwai yaibao. ⁷Dago koneani, te idago da ame

nenama tama da tõe pedalali, te sogo dago magi nai me deli sela asobeo. Menio. Te da olo naga asai. Tama nosali sogo da isibo sogo tama te tõe tagalobode te dago magi nai me deli te dago isibo noma bidigo me sela pogobeo. Menio! ⁸Tama tibaso, dago tubo nai me ugwa me elalubaso da, teda dago dwagi yai homu pemene idu te homu yao, “Te naigo ena usu ilali. Ena dwagi yai homu pemene ebo dao,” te homu yao. ⁹Tiali goli te doado bage hauwa saio homu ebo bidi dabe augwali te buside bidibo uni kibu dabego te nai tugi painogo te denami odobo tiwai ebo dao. Tiali goli te kibu aga te dedagede tulaluyu isabo homu me konegobeo. Te moneba homu konebo bidi dabego homu te tiwai ebo dao. Te augwa homu te moneba daş olama, tama augwaligo te haniani dwai kolesaga wali peyu, tama te homu kolesaga meni yai bidi tiwai bilibadi, te augwa digi dene mabo kolesagago augwali daş wabo dao. Tama tiyu augwa digi dolama, tama augwali dwai mu hobedagia bidaiobao. ¹⁰Magi baso meni, te mone godolo homu ebo kolesaga te tigidali haniani dwai kolesaga page mu elalubao. Te bidi meba augwaligo te bomo elama te mone godolo ebaso, tama te kolesagago augwali kegelama tama augwaligo te Kraisde konealubo po tagalai digi, tama augwa yali dwai se hauwago te augwali homude enani tama genuai dene mu tolali.

Timoti nage tau sabo po nago bomonama uda baso da, te bidibo ula selama, sesemane sogo bidada paibao

¹¹Te bidi dabe meba augwaligo te doado bage hauwa saio homu ebaso tama tiwai dolaibao. Tiali goli Timoti, nage da te Godigo bidi da olama, tama nago te tobage dwai se ebo kolesagaba tudi ola mao. Me ma, nago te bomo elama te doloba pai kolesaga badi, te Godigo godolo mu ebo kolesaga me, te Kraisde konealubo po daş mu wabo kolesaga me, tama te gasa ama dabe godolo ebo kolesaga dolo wali pao. Tama te bomo elama dolaluyu, tama te boi bidi dabego mabo seşę tigidali bugagia tolobo kolesaga me, tama augwali dali nagame elama bidibo kolesaga yao. ¹²Te Kraisde konealubo po daş wabo bidi te ususu si yainogo udabo tiwai se elalubao. Tama tibaso, nago te sesemane sogo bugagia bidada peyu, bidada pabo ula somainogo te se bomo elama yao. Magi baso meni, polobadu nago te we bidi hauwago gedu tomode te “Ena Kraisde konealubo po daş wai dao,” te dwagi yai po nago augwalibolo pusali sogo te Godigo nage sa muyu te bidibo ula saibao wali. ¹³Te God da te tigidali nai bidibo ula menama tonalubo bidi dao. Tama Krai Jisas aga te gavman tuni bidi Pontius Pailat gedude te dolo po naga weyu, aga digi aga te Godigo we bidi tau somainogo tagala palali bidi Krai dao po wai. Tama te God badi, te Krai Jisas dali sigo gedude te tiwai po bomo elama nagebolo eno megı obao:^h ¹⁴nago te Godigo po bugagia tonalua. Nago te gasa bagego te Godigo pode dolobo po wabo gogologio. Te

^h 6:13 Jon 18:37

nago bugagia tonaluali da, teda te pode dwai po wainogo yabo te usu meni yaibao. Nago tama tonalua pidubadi te dago Genuai Bidi Jisas Kraiss te ma asobo sogoba usu nagasu tama Kraiss aga hanilama hania pedalaibao. ¹⁵Aga ma asobo sogo te Godigo aga digi sa muani bodolu sogo elalubo, te sogo te dolo sogo mu naga yaibao. God naga te dwagi yai homu pemene ebo page bidi, tama agaduba deligo naga tigidali şe yabo bomu elalubao. Agai te tõe tuni bidi dabego Tuni Bidi, tama aga te genuai bidi dabego Genuai Bidi dao. ¹⁶Agaduba deli naga te munu me isişabo ula page elalubo bidi dao. Aga te genuai nanobo ula tomode mu bidibo, tama da aga paşa pabo te usu me egobeo. Te bidi me deligo aga munu me sube, tama aga me subo usu egobeo. Genuai nogi mu me, bomu me te agade sesemane sogo bidada peyu, bidada paibao. Mu dao.

Te doado bage hauwa elalubo bidi dabebolo wabo po

¹⁷Timoti, nago te tõe doado bage hauwa elalubo bidi dabebolo e po bomu elama wao: “Dagego te gasa bidi dabe dali hagoma me elamuo, tama dagego te tiwai homu me egio, ‘Eno doado bage hauwa elalubaso, te bugagia bidaibao.’ Dagego te homu me egio. Menio. Dagego daş wabo homugo te nai dabego augwali tau siyu bugagia bidaiba homu elamuo. Magi baso meni, te tõe nai augwaligo da tigidali sogo tau sabo usu menio. Tama dagego e homu yao, ‘Eno Godiba konealubo po daş mu olama, tama agai ena tau siyu, ena bugagia bidaibao,’ dagego te homu yao. Te dago homu dwagi yai pemene emainogo eyu, tama God aga digi te haniani dwagi yai nai te dabolo olo mu mabo dao.” Te doado bage hauwa elalubo we bidibolo te po pusao. ¹⁸Nago te augwalibolo te po weyu, tama e po me wao, “Dagego te we bidi tau sabo dwagi yai kolesaga haniani yao, dwagi yai şe umabo yao, te sesemane sogo dagego doado bage te gasa bidi dabebolo olo mayu, tama te nai dobabo bidi kolesaga bugagia yao,” te po bomu elama augwalibolo wao. ¹⁹Te augwaligo tama tiyu da, teda augwaligo te augwa nosali Godigo bulude te augwali tau sabo bomu hauwa tede elaluaibao. Tama tiyu da, te augwaligo sabo bidibo ula augwali te wiegi yai mu bidibo ula sabo usu mu yaibao.

²⁰Timoti, Godigo agai po nagebolo mani. Nago te po bugagia tonalua. Bidi dabe mebago te Godigo kolesaga wali pişabo olo po dabe wabo dao. Augwaligo homugo augwa wabo po te koneai kolesaga po mu dao. Tiali goli meni, augwaligo wabo po te page meni yai konila ebo po naga dao. Nago te tobage po dabe tudiba muao. ²¹Magi baso meni, bidi meba augwaligo te po wai, “Dago te mu koneanio,” te po wali. Tiali goli augwali geda muyu, tama augwaligo te Kraissde konealubo po daş wabo tagalama tama bidibao.

Te tama dao. Te Godigo olo mu tau sabo wiegi yai kolesaga te dage dali bidao.